



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADSKO VIJEĆE

Odluka
o stipendiranju učenika srednjih škola iz Budžeta Grada Sarajeva
(Prijedlog)

Predlagač: Gradonačelnica
Obrađivač: Gradska služba za obrazovanje,
kulturu, sport i mlade

Sarajevo, januar 2022. godine

Adresa: Hamdije Kreševljakovića 3
71000 Sarajevo, BiH
Tel: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba



Na osnovu člana 26. stav 1. tačka 2. Statuta Grada Sarajeva („Službene novine Kantona Sarajevo“, broj 34/08 – prečišćeni tekst), Gradsko vijeće Grada Sarajeva, na ___ sjednici održanoj ___ .2022. godine, donosi:

(Prijedlog)

**Odluku
o stipendiranju učenika srednjih škola iz Budžeta Grada Sarajeva**

POGLAVLJE I. OPĆE ODREDBE

Član 1.

(Predmet Odluke)

- (1) Ovom Odlukom utvrđuju se opće odredbe, način, kriteriji i postupak stipendiranja učenika srednjih škola iz Budžeta Grada Sarajeva.
- (2) Stipendije Grada Sarajeva dodjeljuju se iz Budžeta Grada Sarajeva za tekuću školsku godinu 9 (devet) mjeseci, a ukupan broj stipendija određuje se u skladu sa raspoloživim sredstvima Budžeta Grada Sarajeva, planiranim za ovu namjenu.
- (3) Visina mjesečne stipendije iznosi 100,00 KM po učeniku što za 9 (devet) mjeseci iznosi ukupno 900,00 KM.

POGLAVLJE II. NAČIN I KRITERIJI

Član 2.

(Obaveza i način raspisivanja Konkursa)

- (1) Gradonačelnik/ca Grada Sarajeva jednom godišnje raspisuje Konkurs za stipendiranje učenika srednjih škola iz Budžeta Grada Sarajeva (u daljnjem tekstu: „Konkurs“).
- (2) Konkurs se objavljuje na službenoj web stranici Grada Sarajeva i sadrži uslove i kriterije koje kandidati moraju ispunjavati, rok i način za podnošenje prijave, iznos stipendije, te druge potrebne podatke.
- (3) Gradonačelnik/ca Grada Sarajeva će putem Gradske službe za obrazovanje, kulturu, sport i mlade (u daljnjem tekstu: „Služba“), po objavljivanju Konkursa na službenoj web stranici Grada Sarajeva, objaviti i Informaciju o raspisivanju Konkursa u dva štampana medija javnog informisanja.

Član 3.

(Pravo učešća)

Pravo učešća na Konkursu iz člana 2. ove Odluke imaju učenici srednjih škola:

- a) koji imaju prebivalište/boravište na području jedne od četiri gradske općine (Centar, Stari Grad, Novo Sarajevo i Novi Grad);
- b) koji se nalaze na redovnom školovanju;
- c) koji ne obnavljaju razred;
- d) koji nisu korisnici stipendija iz drugih izvora.

Član 4.

(Kriteriji)

(1) Kriteriji za stipendiranje učenika srednjih škola iz Budžeta Grada Sarajeva su:

a) nizak porodični standard i otežani uslovi života

- 1) učenik bez oba roditelja (20 bodova);
- 2) učenik bez jednog roditelja (15 bodova);
- 3) učenik čija su oba roditelja nezaposlena (10 bodova);
- 4) učenik čiji je jedan roditelj nezaposlen (5 bodova);

- 5) višečlane porodice, odnosno porodice sa troje i više djece (5 bodova za troje djece, svako sljedeće dijete 1 bod);
- 6) ukupni prihodi po članu domaćinstva u odnosu na prosječnu platu u Federaciji BiH za prethodnu godinu, i to: (do 25%, 5 bodova i od 25%-50%, 3 boda);

b) učenici srednjih strukovnih/zanatskih škola (10 bodova);

c) učenici sa najmanjom prosječnom ocjenom 4,0 (2 boda).

(2) Ukupan prihod domaćinstva kao uslov za ostvarivanje prava po ovoj Odluci čine prihodi koje članovi domaćinstva ostvaruju po osnovu:

- a) plate i drugih primanja iz radnog odnosa;
- b) starosne, invalidske i porodične penzije;
- c) poljoprivredne djelatnosti;
- d) prihoda ostvarenih po osnovu imovinskih prava;
- e) prihoda ostvarenih po osnovu autorskih prava;
- f) prihoda ostvarenih po osnovu privrednih, uslužnih i drugih djelatnost;
- g) prihoda po osnovu registrovane dopunske djelatnosti.

Član 5.

(Prednost u slučaju jednakog broja bodova)

U slučaju da prijavljeni učenici imaju jednak broj ukupno ostvarenih bodova, prednost će imati onaj učenik koji ima više bodova po osnovu niskog porodičnog standarda i otežanih uslova života.

Član 6.

(Potrebna dokumentacija)

Učenici koji se prijavljuju na Konkurs dužni su priložiti sljedeću dokumentaciju:

- a) Prijava mjesta prebivališta, odnosno boravišta (ne starija od mjesec dana od dana prijave na Konkurs);
- b) Potvrda o upisu u tekuću školsku godinu;
- c) Izjava učenika, odnosno roditelja/staratelja ukoliko je učenik maloljetan da je saglasan da se njegovu lični podaci, odnosno podaci djeteta, mogu obrađivati u skladu sa članom 5. Zakona o zaštiti ličnih podataka, a za potrebe provođenja konkursne procedure;
- d) Izjava učenika, odnosno roditelja/staratelja ukoliko je učenik maloljetan da ne prima stipendiju po nekom drugom osnovu;
- e) Izvod iz matične knjige umrlih za učenike bez jednog ili oba roditelja;
- f) Potvrda o nezaposlenosti koju izdaje Služba za zapošljavanje Kantona Sarajevo, Biro za zapošljavanje (ne starija od mjesec dana od dana prijave na Konkurs);
- g) Izvod iz matične knjige rođenih za djecu (za višečlane porodice sa troje i više djece);
- h) Kućna lista o broju članova zajedničkog domaćinstva, uz obavezno dostavljanje odgovarajućeg dokumenta za svakog člana domaćinstva, kojim se dokazuje njihov status, u protivnom neće biti bodovan po kriteriju iz člana 4. stav (1), tačka a), alineja 6) ukupni prihodi po članu domaćinstva i to:
 - 1) Potvrda o redovnom školovanju člana porodice, odnosno rodni list za predškolsko dijete,
 - 2) Potvrda o visini plate za posljednji mjesec,
 - 3) Ček od penzije za posljednji mjesec,
 - 4) Uvjerenje o prihodima ostvarenim po osnovu poljoprivredne djelatnosti, imovinskih i autorskih prava, privrednih, uslužnih i drugih djelatnosti, te dopunskih djelatnosti, koje izdaje Porezna uprava;
- i) Svjedočanstvo kojim se dokazuje da je učenik prethodni razred završio sa najmanjom prosječnom ocjenom 4,0, a za učenike prvih razreda svjedočanstvo o završenom devetom razredu sa najmanjom prosječnom ocjenom 4,0;

- j) Broj bankovnog računa učenika, odnosno roditelja/staratelja ukoliko je učenik maloljetan, na koji će se vršiti uplata stipendije.

Član 7.

(Dokumentacija original ili ovjerena kopija)

- (1) Sva potrebna dokumentacija kojom se dokazuje ispunjenje kriterija za stipendiranje učenika srednjih škola mora biti original ili ovjerena kopija.
- (2) Neblagovremene i nepotpune prijave neće biti uzete u razmatranje.

Član 8.

(Način podnošenja prijava)

- (1) Prijave na Konkurs podnose se u roku od 15 dana od dana objavljivanja istog na službenoj web stranici Grada Sarajeva, lično na protokol ili putem pošte na adresu Grad Sarajevo, Gradska uprava, Gradska služba za obrazovanje, kulturu, sport i mlade, Čemaluša broj 9, sa naznakom, „Konkurs za stipendiranje učenika srednjih škola“.
- (2) Obrasci (Prijava i Izjave) se preuzimaju na službenoj web stranici Grada Sarajeva, www.sarajevo.ba.

POGLAVLJE III. POSTUPAK STIPENDIRANJA

Član 9.

(Postupak rada Službe i Komisije)

- (1) Sve prijave pristigle na Konkurs Služba sa kompletnom dokumentacijom upućuje na sjednicu zajedničke Komisije za razmatranje, obradu i analizu pristiglih prijava na Konkurs za stipendiranje učenika srednjih škola iz Budžeta Grada Sarajeva (u daljnjem tekstu: „Komisija“).
- (2) Komisiju iz stava 1. ovog člana čini 7 članova, od kojih su 4 člana predstavnici Gradskog vijeća Grada Sarajeva i 3 člana predstavnici Gradske uprave Grada Sarajeva.
- (3) Gradsko vijeće Grada Sarajeva svake godine donosi novu Odluku o izboru članova Komisije za razmatranje, obradu i analizu pristiglih prijava na Konkurs za stipendiranje učenika srednjih škola iz Budžeta Grada Sarajeva, predstavnika Gradskog vijeća, za tekuću školsku godinu.
- (4) Nakon donošenja Odluke iz stava 3. ovog člana gradonačelnik/ca Grada Sarajeva donosi Rješenje o imenovanju zajedničke Komisije za razmatranje, obradu i analizu pristiglih prijava na Konkurs za dodjelu stipendija iz sredstava Budžeta Grada Sarajeva za tekuću školsku godinu.

Član 10.

(Zadatak zajedničke Komisije)

- (1) Zadatak zajedničke Komisije iz člana 9. ove Odluke je da prijave pristigle na Konkurs obradi i analizira u skladu sa kriterijima utvrđenim ovom Odlukom, odnosno uslovima navedenim u Konkursu.
- (2) Nakon obrade i analize svih pristiglih prijava, Komisija sačinjava konačnu listu stipendista te istu dostavlja gradonačelniku/ci Grada Sarajeva na saglasnost.
- (3) Lista izabranih stipendista bit će objavljena na službenoj web stranici Grada Sarajeva, www.sarajevo.ba.
- (4) Na listu iz prethodnog stava ovog člana učenici mogu podnijeti pismeni prigovor u roku od 8 (osam) dana od dana objavljivanja iste.
- (5) Po zaprimljenom pismenom prigovoru gradonačelnik/ca Grada Sarajeva će u roku od 8 (osam) dana obavijestiti kandidata, odnosno donijeti odgovor na prigovor.
- (6) Gradonačelnik/ca Grada Sarajeva će sa izabranim učenicima, stipendistima, odnosno njihovim roditeljima/starateljima, potpisati pojedinačne Ugovore o stipendiranju kojima će se regulisati međusobna prava i obaveze.

POGLAVLJE IV. PRELAZNE I ZAVRŠNE ODREDBE

Član 11.

(Pravo obustave isplate stipendija)

Gradonačelnik/ca Grada Sarajeva ima pravo da obustavi isplatu stipendije učeniku ukoliko:

- a) napusti redovno školovanje;
- b) izgubi pravo na daljnje školovanje;
- c) prima stipendiju po nekom drugom osnovu.

Član 12.

(Nadzor)

- (1) Nadzor nad provođenjem ove Odluke vrši gradonačelnik/ca Grada Sarajeva putem Službe.
- (2) Gradonačelnik/ca Grada Sarajeva se obavezuje da putem Službe jednom godišnje dostavi Gradskom vijeću Grada Sarajeva Izvještaj o provođenju ove Odluke.

Član 13.

(Sredstva)

Sredstva za stipendiranje utvrđuju se u Budžetu Grada Sarajeva svake godine za narednu školsku godinu.

Član 14.

(Pravo provjere)

Gradonačelnik/ca Grada Sarajeva može putem Službe da kontaktira relevantne ustanove u slučaju potrebe eventualnih provjera dokumentacije za učenike prijavljene na Konkurs.

Član 15.

(Izmjene i dopune)

Izmjene i dopune Odluke vrše se na način i po postupku za njeno donošenje.

Član 16.

(Prestanak važenja)

Stupanjem na snagu ove Odluke prestaje da važi Odluka o stipendiranju učenika srednjih škola iz Budžeta Grada Sarajeva („Službene novine Kantona Sarajevo“, broj 54/18).

Član 17.

(Stupanje na snagu)

Ova Odluka stupa na snagu narednog dana od dana objavljivanja u „Službenim novinama Kantona Sarajevo“.

PREDSJEDAVAJUĆI GRADSKOG VIJEĆA

Jasmin Ademović

Broj:
Sarajevo, __. __. 2022. godine

OBRAZLOŽENJE

PRAVNI OSNOV

Pravni osnov za donošenje Odluke sadržan je u članu 26. stav 1. tačka 2. Statuta Grada Sarajeva kojim je propisano da Gradsko vijeće Grada Sarajeva donosi odluke, druge propise i opće akte i daje njihovo tumačenje.

RAZLOZI DONOŠENJA

Grad Sarajevo je u proteklih pet godina uspješno realizovao Projekat stipendiranja učenika srednjih škola iz Budžeta Grada Sarajeva. Projekat se pokazao kao izuzetno uspješan, što potvrđuje činjenica da je broj prijava na Konkurs za dodjelu stipendija kontinuirano rastao. Međutim, na osnovu dosadašnjeg iskustva u radu, prilikom provođenja kompletne procedure i značajnog rasta broja prijava, kroz detaljnu analizu ustanovljeno je da je ipak potrebno pristupiti izmjeni tj. pooštavanju kriterija što je ujedno bio i jedan od zaključaka zajedničke Komisije za razmatranje, obradu i analizu pristiglih prijava na Konkurs za dodjelu stipendija iz sredstava Budžeta Grada Sarajeva, odnosno sugestije Odbora za društvene djelatnosti Gradskog vijeća Grada Sarajeva te Zaključka Gradskog vijeća Grada Sarajeva da se pripremi novi Prijedlog Odluke o stipendiranju. Shodno iznesenom pristupilo se izradi novog Prijedloga Odluke kojom su se propisali novi kriteriji, preciznije definisali stari kriteriji te uveli neki novi koji bi trebali doprinijeti još efikasnijem pristupu u realizaciji postupka dodjele stipendija Grada Sarajeva. Shodno naprijed navedenom, cijeneći izuzetan značaj ovog projekta, kao i potrebu da se unaprijedi propis kojim se reguliše ova oblast, Gradsko vijeće Grada Sarajeva je donijelo Odluku.

OBRAZLOŽENJE PREDLOŽENIH RJEŠENJA

Članom 1. Odluke utvrđuju se opće odredbe, način, kriteriji i postupak stipendiranja učenika iz Budžeta Grada Sarajeva za tekuću školsku godinu te visina mjesečne stipendije.

Članom 2. propisuje se obaveza i način raspisivanja konkursa.

Članom 3. i članom 4. propisuje se tko ima pravo učešća na konkursu, kao i kriteriji za stipendiranje učenika.

Članom 5. propisuje se koji učenik ima prednost u slučaju jednakog broja ostvarenih bodova.

Članom 6. propisuje se dokumentacija koju su učenici dužni priložiti prilikom prijavljivanja na konkurs.

Članom 7. propisuje se da sva potrebna dokumentacija treba biti original ili ovjerena kopija, a članom 8. propisuje se način podnošenja prijava.

Članom 9. i članom 10. propisuje se postupak rada Službe, odnosno zajedničke Komisije za razmatranje, obradu i analizu pristiglih prijava na Konkurs.

Članom 11. propisuje se pravo gradonačelnika/ce da obustavi isplatu stipendija u odgovarajućim situacijama.

Članom 12. propisuje se tko vrši nadzor nad provođenjem Odluke, kao i obaveza podnošenja Izvještaja o provođenju Odluke Gradskom vijeću Grada Sarajeva.

Članom 13. i članom 14. propisuje se kako se utvrđuju sredstva za ovu namjenu u Budžetu Grada Sarajeva, kao i pravo gradonačelnika/ce Grada Sarajeva da u slučaju potrebe kontaktira relevantne ustanove.

Članom 15. propisuje se način izmjena i dopuna Odluke.

Članom 16. i članom 17. propisuje se prestanak važenja ranijeg propisa te stupanje na snagu Odluke.

FINANSIJSKA SREDSTVA

Finansijska sredstva za realizaciju ove Odluke obezbijedena su u Budžetu Grada Sarajeva.